



Andy Murray aser Novak Djokovic na pilaogo

PM Modi-i Indian armed forces nem tetushi agütsü



Donald Trump-i yaritsü ashiba magizüker Pakistan-i Kashmir toktsür aotsüla: India

New Delhi, May 13, 2025 (Agencies): US President Donald Trump-i Kashmir atema tiyongtsüi ia jembitsü ashiba magizüker aser Pakistan-i ozüing alema Kashmir atsünga agia aliba toktsür aotsüla ta Mongulbarnü India-i metetdaksüogo.

"Jammu and Kashmir dak sendakba onük ajak third-party medeni Pakistan den dang jembitsü. Onük tongtipangbaji Pakistan-occupied Jammu and Kashmir toktsür aotsüba lir" ta Ministry of External Affairs spokesperson Randhir Jaiswal-i ashi.

"Union Territory of Jammu and Kashmir dak sendakba onük ajak India aser Pakistan tsüingda dang jembitsü ta asenoki mapang talangka nungi inyaka arur. Iba policy memelenshi aser Pakistan-i ozüing alema India lushi atsünga agiba toktsür aotsüla" ta pai ashi.

Operation Sindoor tenzükba mapang nungi India aser US tanishirtem tsüingda jembishinü

liasü saka iba nung shishilembabaren onük mebenok ta Jaiswal-isa ashi.

India aser Pakistan tsüingda rara anendaktsüba nung par sorkari tongti shilem agi ta Hombarnü US President Donald Trump-i shia liasü.

Line of Control (LoC) nung rara anenaka Indus Water treaty anenba nungi masetshir ta Randhir Jaiswal-isa metetdaksü.

Kiralongrartemi Pahalgam amakba sülen India-i Indus Water Treaty of 1960 anena ayutsü telemtetba agia liasü.

"IWT ya linük ana tsüingda jungteptsü aser medemer ama alitsü nükjiding nung nangzüktepba liasü. Ajisüaka Pakistan-i küm aika iba tangatetbaji senzüka yutsür cross-border terrorism inyaka arur. Pakistan-i cross-border terrorism meinyaktsü ta züingzünga nangzükba sülen ang IWT mapa tenzüktsü CCS-i lemtetba nungi masetshir" ta Jaiswal-isa ashi.

Chakhesang Students' Union-i gari 12 pua lir

Kohima, May 13, 2025 (TYO): Chakhesang Students' Union (CSU)-i NHIDCL aser parnok contractor indang gari 12 tashi puogo.

29 km Kohima-Jessami National Highway aser talisa Chakhabama-Kikruma (Package-II) sector nung CSU-i garitem apu.

Phek district kübok Kikruma area nung NH-29 mokdangba mapang CSU-i lungkak aittsü tenzük mezüing anogo ana tsüingda gari 13 pua liasü aser iba nung sorkar gari ka densema liasü.

Iba mapatong kübok 29 km Kohima-Jessami lenmang kanga mejungi lir aser iba ajangba senzusenbongertemi timtem kanga ajurur ta CSU-i Deobarnü metetdaksü.

Parnoki NHIDCL aser parnok contractor den sendaktepa aliba sorkar gari ajak noktangtsü metetdaksü.

Ajisüaka, iba tenokdangba kübok medical, administrative,

police, paramilitary forces, fire & emergency services, power aser PHE department staff madener.

"Mongulbarnü volunteers-i NHIDCL indang gari 4 apu aser Hombarnü state sorkar gari ka dena gari 9 apu" ta CSU president Pfhulo Sara-i ashi.

District administration-i Hombarnü Deputy Commissioner office nung onok aser contracting firms tsüingda senden ka amentsü ayongtep. Ajisüaka, iba senden nung telemtetba kecha magitet kechiyong CSU-i tebang agi nangzükba magizük.

CSU-i contractor dang mapa inyakba tesem nung nüngdakba koltem aser nübo peria anir arutsü takhangba agütsü.

Iba highway ajanga Kohima nungi Jessami sendakteper aser iba ya Phek kübok Kikruma nung aser Meluri o Kiphire district nung alirtem atema kanga tongtipang lir.

Nagaland nung hopta ka tzüinglu arutsü: NSDMA

Dimapur, May 13, 2025 (Agencies): Nagaland nung May 15 nungi May 21, 2025 tashi tzüinglu arutsü ta Nagaland State Disaster Management Authority (NSDMA)-i metetdaksüogo.

Item anogotem tesem balala nung tzüinglu terara arutsü saka May 18 nung district ajak nung tzüinglu kanga arutsü ta NSDMA-i sangdong ka nung ashi.

Tesem kar nungbo tsüingi aia tzüinglu terara arutsü aser hopta piyong tzüinglu aruba manentsü ta parnokisa ashi.

"Tsüingi aitsü aser mopung

aontsü tetzüba ajanga communication aser connectivity nung timtem ajurutsü akok" ta NSDMA nung Joint Chief Executive Officer Dr. Johnny Ruangmei-i ashi.

Iba dak sendakba nung NSDMA-i public dang kümdanga alitsü aser talisa May 18 nü tzüinglu kanga arutsü ta asüba anogo nung lendong nungi jenbua alitsü metetdaksüogo.

NSDMA-isa District Disaster Management Authorities (DDMAs) aser line departments ajak renema alitsü metetdaksüogo.

District 9 nung May 10 nungi shishilembabaren anentsü



Dimapur, May 13, 2025 (TYO): Nagaland nung District Chambers of Commerce and Industries (DCCIs)-i May 19 nungi mapang telatet makai shishilembabaren anentsü metetdaksüogo.

District 9 nung urban local bodies (ULBs) nung parnok züingsem kaka anioaktsü akhangba meinyakba atema DCCI temi state sorkar anema lungkak aittsü.

Kümsük 2025-2030 atema Confederation of Nagaland Chamber of Commerce and Industry (CNCCI) ketdangpur tasen shimoka mapa agütsüba sentong nung CNCCI president Dr Khekugha Muru-i iba osang metetdaksü.

Iba sentong nung Dimapur, Chümoukedima aser Kohima DCCIs ketdangpurtem aden.

DCCI 9 ji Dimapur, Chümoukedima, Niuland, Peren, Wokha, Zunheboto, Phek, Tseminyu aser Meluri lir.

Nagaland nung DCCIs 11

atema CNCCI ya tekolaktiba telok lir.

"Nagaland nung DCCIs ajak tenüing nung CNCCI-i sorkar dang iba onük atema shidi aiben zülüogo. Nagaland kübok municipal aser town councils ajak nung DCCI shia nungi teshimtet nübo kaka dendaktsütsü atema shiogo saka state sorkari iba mapa meinyaker" ta Dr. Muru-i ashi.

"State sorkari Kohima aser Mokokchung municipal councils nung DCCI züingsemtem anioakba atema pelar saka tanüingba district 9 nungbo ULBs nung DCCI züingsemtem maniokba atema aoksar" ta paisa ashi.

"Onoki iba atema Chief Minister, Deputy Chief Minister, Chief Secretary aser Urban Development and Municipal Affairs Advisor dangi shiditem zülüogo" ta paisa metetdaksü.

District 9 nung DCCI temi tesüiba nunga shishilembabaren anentsü sangdong ka agütsüogo

as er parnoki ULBs nung parnok züingsemtem dendaktsünür, ta Dr. Muru-isa shisem.

CNCCI ketdangpur tasentem rongnung Dr. Khekugha Muru tanaben chairman shimogo.

Ketdangpur tasentem rongnung Dr. Seyieville Mor, Jabou Sekhose aser Dorothy Chang nunger vice chairmen aser Avi Chase general secretary inyaktsü shimogo.

Maneni, Secretary atema Tsalichum S Sangtam o Kekhrietuo Kelio, Grievances Tribunal Convenor Omega Yephthomi, Joint secretaries atema S Abenthung Ngullie, Tocky Zhimo o Chiloising Michoi, aser Treasurer atema Kevin Yephthomi shimogo.

April 22, 2025 nü CNCCI-i takhangba atema April 24 nung temulungertemi shishilembaba shibangtsü osang metetdakja liasü. Ajisüaka state sorkar den olemtepba sülen parnoki iba sentong thinena atatsü telemtetba agia liasü.

Assam nung okadaki 'Magic Healing' ken o agiener

Guwahati, May 13, 2025 (Agencies): Assam nung arogo lennir kati 'magical' mesüra 'faith healing practices' ajanga nisungtem tamangba yimsü melendaktsü ta tai tongloktsüba ken o ka Golaghat district nung okadak kati agiengogo.

November 23, 2024 nü Golaghat Baptist Church nung arishi küm 38 tain project coordinator Pranjal Bhuyan apu. Ketdangsürtemi Assam Healing (Prevention of Evil) Practices Act, 2024 kübok pa dak tai tonglokja apu.

Ajisüaka, May 13, 2025 nü okadaki iba ken o agienogo aser iba atema Assam Christian Forum-i obendang shitak agütsüba atema tenüingsang agütsüogo.

Bhuyan-i nisungtem dang Laishiba sayua tamangba yimsü melendaktsütsü atema "magical healing" amshi ta tai tongloktsü.

Iba ken o ajanga Bhuyan aser par kibong nem timtem tuoshi



bentsür aru aser Assam nung Khristantem aoksaktsü. Iba ashishitep aketba Act kübok pa mezüing tai tonglokja apu ta ACF-i ashi.

Golaghat court-i kulitem jungjunga asadangba aser shisadangba sülen Bhuyan anema benokba ken o metentsü kuli kecha mengutetba metetdaksüogo.

"Iba obendang ajanga Bhuyan aser Golaghat Baptist Church nem anisüngzük bentsür aruba dang masü saka okadaki temeten

atema tenangzükba nenshir" ta ACF-i ashi.

Iba obendang ajanga Indian Constitution, talisa Article 25 dak tamang akar aser iba ajanga sensotemi talenba kecha melii amangtsü aser pei tamangba yimsü prokshitsü temeten agütsür ta ACF-isa metetdaksüogo.

Ketdangsürtemi Assam Healing (Prevention of Evil) Practices Act tim mesüi amshiba atema tebilemtsü abener ta parnokisa shisem.

Wokha district nung 'No Work No Pay' benoktsü: Y. Patton



Wokha District Planning & Development Board senden May 13, 2025 nü Deputy Commissioner, Wokha indang Conference Hall nung amendang Wokha DPDB Chairman Yanthungo Patton-i o jembidang tangokba noksa nung angur.

Dimapur, Monupii/May 13 (TYO): Nagaland Deputy Chief Minister aser Wokha District Planning & Development Board (DPDB) Chairman tasenba, Y. Patton-i Wokha district nung aliba ketdangsür aser staff dang 'No Work No Pay' mapa kuma inyaktsü tekumdangtsü ashi.

May 13, 2025 nü Deputy Commissioner, Wokha indang Conference Hall nung Wokha DPDB senden amenba mapang pai iba o ya shia liasü.

Mapai teti arutsü tongtipang ta angatetdakja jembidang Patton-i ajungbena department balala tsüngdong arua semdangtsü ta ashi.

Mapai maruba employees indang taa ya agizüker district telungzük nung civil society tem yariba nung amshitsü, ta pai sangdong.

"Sorkar mapa inyaker mapai maruba mechi meta talang nungi aruba nüburtem tim metemdaktsütsü," ta Dy. CM Patton-i ashi.

Junga yimsü asütsü aser tenzütsü tangatetba akangshia Patton-i District departmental heads tem dang terenlok maparen aser ki o jen aser osettsüet nüngdakba proposals tem temaba ketdangsür nem agütsütsü ajungshia liasü.

Züngsem timba shilem agitsü mechi taruba ita nungibo DPDB

senden ya Honibar anogo agitsü aser ketdangsür ajak adentsüla, ta pai sangdong.

Wokha DC office yanglutsü atema sorkari agizükba indang osang metetdaksü dang, iba office ya mini Secretariat ka ama alitsü ta ashi aser Loth Hoho, LSU, Lotha Women Hoho tem dang contractor mapa meita alitsü ayongzük aser nüngdakba standard nung mapa meinyakra sen magütsütsü, ta Patton-i ashi.

Iba senden nung MLA aser Bhandari SDPB Chairman Achumbemo Kikon-i district telungzük nung terenlok maparen balala indang lemsatapa liasü.

Iba senden nung Wokha-Merapani lenmang tajungba kuma yanglushitsü, Deputy Commissioner's Complex yanglutsü, Merapani Seed Farm aser Doyang nung ADC headquarters amenoktsü indanga jembia liasü.

Taoba DPDB senden nung renema aliba pangzüng, Government Higher Secondary School Wokha nüngja Lt. Mhondamo Memorial Higher Secondary School ta melentsü proposal pai lephshia liasü aser temelaba agitsü atema temaba ketdangsür dangi yoktsü lemtet.

Iba nüngja ya M. Kithan tushia agütsür, shiba Nagaland indang Education Minister

mezüngbuba, Lotha nunger rongnung mezüngbuba graduate aser Naga National Council indang tir tanabuba liasü.

Lotha nunger aser Naga nunger asoshi pai shilem tajung agiba bilemteta aser pa nem akhum agüja iba kaket reju tenüng melenshitsüba yagi shisaliok aser lenir mapa bendanga agütsür inyakba sayur, ta Chairman WOKHA DPDB, Yanthungo Patton-ia ashi.

Iba senden nung Board ajanga HSLC aser HSSLC examinations 2025 nung tako tajung nguteter nem tenüngsang agüja liasü. Item kaketshir ya Spring Dale School Wokha nungi Denben C. Murry (top 8), Libemo Memorial School Wokha nungi Sojano Eri (top 13 aser Fernbrook School Wokha nungi Zejano H. Ngullie (top 17) nungertem liasü. Y Patton-ia tepela temaitsü takoker shia nem sen 20,000 amokja liasü.

Senior Scientist aser Head of ICAR-KVK Wokha, Dr. Sandeep Deshmukh-i PowerPoint presentation ka ajanga tesüiba mapang aluyimba aser scheme balala inyakba indang lemsatapa liasü.

Wokha DPDB senden ya Deputy Commissioner, Wokha, Vineet Kumar, IAS lenisüba kübok mena liasü.

Committee on Petitions senden ayonger

Dimapur, Monupii/May 13 (TYO): MLA aser Chairperson, Committee on Petitions (2025-2026), Benei M. Lamthiu-i 2025-2026 atema Committee indang Introductory Meeting ya May 19, 2025 anüngdang 11:00 ako nungi tenzüka Asembly

Secretariat nung aliba C. Chongshen Committee Room nung alitsü, ta sangdong ka nung matetdaksüogo.

Anungji iba senden nung Committee on Petitions indang züngsem ajak medema arua adentsü ayongzük, ta sangdong ajangasa ashi.

Kohima nung CRPF Jawans temi azü tenla agüja takum kümzük



Dimapur, Monupii/May 13 (TYO): 78 Battalion, Central Reserve Police Force (CRPF) nungi Jawan ana, CT/GD Hengoulal Khongsai aser CT/GD Bapina Maharana nati Naga Hospital, Kohima nung shiranger ka takum kümzüksü asoshi May 13, 2025 nü azü tenla agüja liasü.

78 Bn. CRPF indang Commandant ajanga sangdong ka nung tenati mapa tajung inyakba ya temeim sayuba aser nübur tenzüka nung bendanga agütsüba tatishitsü lir, ta ashi.

"Azü tenla agütsüba ya mapa tajung lir, koba ajanga zünger mezüngma nisung takum kümzüktettsü. Jawans temi pei asoshi mebilemi inyakba ya takum bendanga agütsüba aser temeim tanüla CRPF dak aliba tatishitsü lir," ta sangdong ajanga ashi.

78 Bn. CRPF ya mapang talangka nungi community outreach initiatives, talisa timtem mapang nüburtem den yaritepa arur. Medical camps aser civic action programs tem ayongzükba nungi tenzüka lanurtemi takok anguba tushia, koda masüba mapang teyari agüja battalion dak nüburtemi tamang kateta kumogo.

"Ozü Jawans tem ya nüburtem kümzüksü atema kisüng masü saka tenzüksü asoshi renema lir. Külemi aliba nüburtem den yaritepa aser dena lir ta temaitsü yimya balala nung sayuba rongnung azü tenla agütsüba ya ka lir."

Maneni CRPF personnel dang maneni takum kümzüka maparen nung shilem agia nüburtem den tesendaktep yanglutsü ayongzük, ta sangdong ajangasa ashi.

Prevention of Child Marriage awareness agütsü

Dimapur, Monupii/May 13 (TYO): District Child Protection Unit, Shamator ajanga 'Akshaya Tiritiya' nüngtem nung May 12, 2025 nü Government Higher Secondary School Shamator nung Prevention of Child Marriage indang awareness sentong ka ayongzüka liasü, kong EAC Shamator, Mekato J Aye sentong akhumdong liasü.

Aye-i iba sentong nung jembidang kaketshirtem dang pei mangdang arishitsü aser Child Marriage anema raraba nung ambassador ama awareness agütsüba nung shilem agitsü ayongzüka liasü.

Legal-cum-Probation Officer, DCPU, Cherry Ovung ajanga 'Prohibition of Child Marriage Act, 2006' indang onük nung ajemdaker kaketshir nem tetsür aser tebur tem kibong

akumtsü asoshi legal age indang awareness agütsü.

Laisa kaketshirtem dang Child Marriage nung timtem aser temerenshi aliba indang angatetdakja liasü.

Counsellor, Child Help Line, Sothrunkiu Kips-i 'CHILD HELPLINE 1098' indang onük nung jembidang tanurtem dak sendakba ken o balala nung Child Helpline ya first responders lir ta metetdaksü aser kaketshirtem dang tashiyim amshia merenshiba, mesüshiba, yutsür aoba mesüra tanur dak sendakba ken o mashi nung 1098 dangi call asütsü ashi.

Iba sentong nung Protection Office (NIC), DCPU Mongshai menden liasü aser Case Worker, Child Help Line Neotola S ajanga melepzüng o jembia tembang.

Mejangjaba nisung tasü mang ka nguteta lir

Dimapur, Monupii/May 13 (TYO): Mejangjaba nisung (non-Naga tebur) ka ICAR, Medziphema anasa lenmang tezülen laoa aliba May 12, 2025 nü ngutet. Iba nisungba ya CHC Medziphema bushia bener ao saka yangji temang anepaluba mapang asü, ta Dimapur Police sangdong ka ajanga ashi.

Tasü mang kanga junga meita bushi saka temulung

melemtettsüsa kecha mongutet. Ozüng agi melaba maparen ajak tembanger tasü mang ya PM examination/identification atema District Hospital Dimapur Morgue nung bener oa lir.

Kibur/kinunger/tembar temi Officer-in-Charge, Medziphema PS, Chümoukedima den mobile No. 7085055023 ajanga tongteprateptsü akok, ta sangdong ajanga ashi.



Nagaland Angh La Ganesan-i May 13, 2025 nü Naga Bhavan Conference Room, Raj Bhavan, Kohima nung Department of School Education nungi ketdangsürtem den senden ka mena liasü.



NAGALAND POLLUTION CONTROL BOARD

Signal Point, Dimapur - 797112, Nagaland
Tel.: 03862-245727, TeleFax: 03862-245726
Website: www.npcb.nagaland.gov.in e-mail: npqb2@yahoo.com

AMBIENT AIR QUALITY FOR KOHIMA AND DIMAPUR CITY KOHIMA ASER DIMAPUR NUNG MOPUNG MERÜK-MEMERÜKBA JENJANG

Sl. no	City	Location of air station	Type of area	Monitoring dates		Permissible limit As per the National Ambient Air Quality Standards "Iba tasazük alemabo metudaktsütsüla"
				06.05.2025	08.05.2025	
1	Dimapur	Bank Colony	Residential	75	114	100 µg/m³
2		Dhobinala	Commercial	90	118	
3		NPCB Office, Signal Colony	Residential	78	107	
4		Nagarian	Residential	58	96	
5		Viola colony	Residential	50	62	
6		Burma camp	Commercial	85	119	
8	Kohima	Opposite NST Office	Residential	43	64	
9		PWD Junction	Commercial	79	69	
10		High School Junction	Commercial	88	91	
11		Midland (Upper)	Residential	53	62	

Iba osang ya nübortem ajangzüksü atema Nagaland Pollution Control Board-i agütsür.



TIR YIMYIM YIMOBILEM (EDITORIAL)

DIMAPUR WEDNESDAY, MAY (MONUPII) 14, 2025

Football asayadakbosa akatsüla

Naga nungertemi jangraba asayaji football ya ka lir, anungji football asayamong yabo Naga nungertemi benjong küma longsutepa repeanger. Aji oda, India nunger mezüng Olympic nung football asayai anir aosangjia Naga nunger rongnungi Aor chanu Dr.T.Ao liasü. Ibaji tesüngmangtsüka lir. Iba nung jagi tenzüker football ya Naga nunger meyong asaya amai küma yimtsüng ajak nung football ground atutsü tenzüki südi. Aji oda, tang tashi nung pei pei yari artuba football ground maliba Naga nunger yimtsüngbo shinga malitsü südi. Ajisüaka, asenok dak football asayatsü tejangraba aliba dak alaka football asayatsübaji pei mapa kümer Dr.T.Ao amaji alimai meteta football asayar adokba mejangjar. Ibaji ashiko Dr.T.Ao mesüka pa sülen football asayar lanurtem madokba agi masü saka football asayatsü sempet alirtem reprangteta anepalutsüsa Nagaland government sentong nung maliba ajanga asütsüa akok. Aji oda, tawa tanü Kohima nung Indira Gandhi Stadium aser Chümoukedima aser tanga district ka ana nung state government-i temulung agüja football asayadak ayi melen nisungi yangluba Astroturf amshia yangluba nung asaya tenzüka angur. Item asayatem rongnung tawa Chümoukedima nung Ngaland Super League kanga takok ngua asayaba nguogo. Atangji, tangbo Nagaland ajaklen mesüaka Astroturf amshia yangluba football ground tajunga lir aser tangar adoksaa asayatetsüsa asayartema lir ta reprangogo, anungji state government-i ano temulung tagütsüba agüja district shia nung football ground tajung yangluja asayartem ajungshia anepalu nungbo, küm ishika tsüngda ano Naga nunger rongnung T.Ao adoktsü teimla tulu lir. Atangji, asen lima nungbo, tangar lima ama masü, industry tulu lapoka mapa inyaker company tulu maliba agi asayartem dang masü saka kentenertema ajungshia senotsü nung yaritsü pur mali timatemer. Iba timtem jagi asenok nem Tsüngremi agütsüba sempettem rongsen tulu küma mamshiteter. Ibayongji, tang tashibo government-i meinyakra Naga nunger sempet tajung aketer lanurtem aika nüngtugu küma alitsüba agi shingaa memetet ser taküm atemtsü. Atangji, cricket ama tanga asayatem nung anguba senpet sen amabo football asayaba nung mangur, saka tajung dang junga asayatetra football asayaba nunga tajangzüko angutsü. Ajisüaka, taküm nung kechi inyakdir inyakaka sen kwi angur ta asübaaji tongtibang masü saka kechi jangrar ta asübaaji tongtibang lir. Aji oda, Naga nungertemi football asaya jangraba ya sen aika anguba agi masü saka tejangraba agi asayar aser, atangji, ibajiang taküm nung jangratemtsüka lir. Ashiko, football asaya ya Naga nungertem rongnungsa süaka Aortemisa tejangraba asaya tenzüki südi, ibayongji India yimten nüchiso nguli alima kintem nem metetdakja Indian football team Olympic nung mezüng shilem agia asayadanga Aor chanu ka leniba nung asayaba tanü tashi takok anguba danga taoba tetshir. Aji oda, Yisu temeim osang tajung den kaketshisatsü metetba aser sayuba nung dang samanir masü saka football asaya nunga Naga kintem rongnung Ao kin ya samanir kin asütsü südi. Iba ama football nung samanirtem adokdak lima, Ao lima nung tang tashi NSL ama asayamong mapang asaya anasemka danga asayadaksütsüsa ground kata renemtetba makabaji asenok ajak külem tamakok asütsü. Atangji, Mokokchung town anasa Ungma nungbo yakta Astroturf football ground ka renemtsüba lir ta angazüker. Iba jagi asenok tera nümadangtetsü. Iba denji külemi Mokokchung town nunga akhidang nungi asayaa aruba tesem Imkongmeren Sports Complex ya tangar jilu tajungji ajizüka astroturf amshia stadium yanglutsü ariptsübaji kanga nüngdaka kümogo. Iba tesem nungji bilemba ama stadium meyanglutetsüsa kümra, sepaitem aliba tesem ka azüngtetdaksür yangji asaya tapu ajak asayatetsüsa stadium tuluka yanglutsü sentong tenzüksüla. Iba denji külemi Mokokchung district kübok tesem balala nung Astroturf-sa mamshiyonga ground tasazük shitak adoka stadium yanglur ayi manung asayatsüsa anepalutetra, iba jagi asen lima nung football asentenshi tulu adoktsü. Atangji, Dimapur nung state stadium yanglutur aliba ya yaktasa renemtsübajia kanga tongtibang mapa ka asütsü. Aji oda, Tsüngremi asenok nem moatsüba temoatsütem asenoki reprangteta, Mokokchung dang masü saka Dimapur aser Chümoukedima-jia asen lima kümer angutsü.

OLEMSABANG

KIBONG LIRUMEDDEM TAMANG

~ Mrs. Amenla APW, Akhoya Baptist Arogo

(Yashi adok nungi...)

5. Graham Stains Kibong

Australia nunger Missionary, 1999 küm par jabaso 2 den Dara Singh aser par teloki Gari nung mejanga lia mi agi rongseta südaktsü. Shi nung bilemstübo kangasa tejashitsü ulura, saka kinungtsüi par asem mangjak nung yamai ashi "Shirnoki iba ama mapa tamajung inyakogo, ni parnok dang mejashir, Saka parnok dang Yisu tenüng nung tai adoker" Jalaia yamai Tsüngrem tenüng sanga ashi, Kibuba na asoshi asütsü nai kübu temsüa angu nung ne tenüng asanger". Kibong nung iba ama tesama, lendong, shisabulu aser nüktzü tia ajurudang tenüngsang aser tatok agütsütetba tamangji koda.

II. TAMANG LIRUMEMEDEMBA KIBONG NOKSA KAR

1. Lot-er kibong (Lipok 19:23-38)

Lot ya Abraham tenu Haran-er jabaso liasü. Tsüngremi Lot-er kibong ya kanga dang moatsü. Yordan lenden Sodem aser Gomora nung par kibong ali. Iba yimti ya mamanger yimti ka liasü. Iba yimti nüburtem ama, par kibong alima tashi aser rongsen nem kokdaksür liasü. Lot kinungtsüi Tsüngrem masü rongsenang onsara meim, anungji tesama ajuru. Lot-er jala anati tebu den maksütsü mapa inyak.

2. Eli-er kibong (1 Samuel tapu 2-4)

Eli ya temaba putir, Tsüngrem tenzüker saka pa jabasotemi tarungba tenla agütsütsü nüburi bener aruba rakzüka achi. Tekülemi arur aiür tashiyim agi raksatsü. Ajaki Eli Putir kibong ya semba adok. Tatem nung kibong ajunga tesema aser maksü tulu ajuru.

3. Isak-er kibong (Lipok 27)

Isaker kibong nem jabaso tajung 2 moatsü. Isaki Jabaso Esau meim aser tetsü Rebekai Yakob kanga dang meim. Kibong nung tetsü o tebu na lemdanger pei chir meim. Kibong nung tetsüi tekülak mapa inyaka ashiocksütsü sayu, saka tebu aji memetet aser melazük. Iba yongji par kibong nung tejashi, shisabulu khuret aser nüktzü ayimba tia ajurua kibong rangpen anokshi.

Kibong tamang lirumemedemra aiben pelatepba malir, Tsüngrema mepeladaksüteter aser asen taküm aser kibong sentong aika tamakok angur. Kibong tashi meitra lokti ajak tashi maiter ta meteta temeneni mapang ajak nung asen kibong anokshitsü aser atidangtsü meranger. Iba mapang kibong nung alir kar danga Tsüngrem nungi pilar Tanela nung tashi meit-i lira iba tapok nung jagi temenenji asen kibongi aiter aser pai asen kibong nung mapa inyaktsü tenzüker. Mark 14:38 (a) "Nenok tatitang nung metsüktsü asoshi saksalema liang aser sarasademang".

Kibong tamang lirumedemtsü asoshi kibong nung alir ajaki Tsüngrem akhümtsüba Pai mulungba lenmang nung jajaba taküm ka ka asütsü kangasa tongibang lir. Tanü asen aliba lima ya reprangdanga tetsübuttsü lendong timtem, taoksatsü osang agi dang süngadokogo, kibong ajunga Tsüngrem dak metaloker, shi aser Tanela nung longjemer saksalema aliba ajanga dang item lendong timtem aser tatidang ajak nungi jembua litettsü.

Anungji, Lirumedem tamang kibong ka yangertettsü asoshi kibong nung alir ajaki tali Tsüngrem akhümtsüba, pa dak metaloker mapang ajak nung Tsüngrem 0-i melaba ama tashi anga tazüokba nung jajaba taküm ka ka asütsü iba ocet ajanga amangbapurtem ajak ayongzüker.

Tsüngremi moajang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Central Nigeria nung Khristanpur anema inyakba manener

Abuja, Monupii/May 13 (Agencies): Fulani shiruru metsürtemi central Nigeria nung May 7, 2025 nü Khristan ana tepset aser kasa tesem nung taoba ita nisung ter tepseta liasü, ta osang ajanga ashir.

Shiruru metsürtemi Benue state indang Otukpo County kübok Otabi-Alpa yimtsüng nung tamanger aluyimer ana tepset, aser tena ya Agatu County nungi lir, ta Agatu Local Government Council züngsem Marvis Ejeh-i ashir.

Tena rongnung ka Khristanpur timba aliba Odugbeho yimtsüng tekolakba Tony Adejoh aser ka ya Jerry John liasü, ta Ejeh-i ashir.

"Tenaprong Otobi-Akpa nung pei lu inyakba mapang shiruru metsürtemi atsüka atar tepset," ta Ejeh-i Christian Daily International- Morning Star News dang ashir.

Iba tesem nung alir Noah Unogwu-ia tena ya Fulani shiruru metsürtemi tepset ta ashir.

"Khristanpur alidak yamai tepsetba kobika alitsü?" ta Unogwu-i Christian Daily International-Morning Star News dang text message ka nung ashir.

Yangji alir David Okpe-ia text message ka nung iba azüdokshi indang ashir.

"Fulani shiruru metsür temi tawa azüdokshiba ya temulung ayanger aser magizükteter, aser ki o jen raksatsüba aser takum samatsüba ya tasü mait mapa lir," ta Okpe-i ashir.

"Nisung meimchir temi kasa nisung dak yamai taochi mali inyakba atema süngmanger. Khristanpur dak azüdokshiba azüoktsü asoshi security agency temi mapa tali inyaktsü nüngdaker."

Fulani shiruru metsürtemi April 13 nuga Otukpo County kübok Otobi-Akpa tesem maka tamanger ter tepset, ta yangji alirtemi ashir. Iba lendong

agütsür ya Fulani shiruru metsürtem lir ta Patrick Godwin-i ashir.

"Khristanpur aika tepset aser taliba ki raksatsü. Nikongdang 6:00 ako mapa iba yimtsüng ya amak," ta pai text message ajanga ashir.

Benue State House of Assembly züngsem Agbo Kennedy-ia Khristanpur nisung ter tepsetba ya ashir.

"Otobi-Akpa community nung Khristanpur anema azüdokshiba ya tesüngmangtsü aser taoksatsü mapa lir. Arishi küm pongu tanur densema tepset. Asürtem temang nung injang aser nok agi alepba zübu liasü. Iba nikongdang 6:00 ako meta nisung timba alu nungi meyipa shilanger lia tantsür-tambur densema tepset," ta Kennedy-i ashir.

Benue State Police Command indang odongtar Catherine Anene-ia Otobi-Akpa nung azüdokshiba indang ashir.

"Benue State Commissioner of Police-i iba tesem nung police personnel tali yoktsü totuyuba agütsüogo. Yangji aliba nüburtem dang ya dang shiner, parnok dak amaker tsüngsü pua aotsü aser aputsü aser ozüing agi alentsü," ta Anene-i ashir.

Muslim Fulani nunger ya Nigeria aser Sahel tesem ajunga nung lir aser parnok ya tezü balala nungi jakzükbakidong noklang aika lir aser parnok yagi Islam yimsü aroka mamanger, saka Fulani nunger kari radical Islamist tesayuba sülen anidaker, ta United Kingdom indang All-Party Parliamentary Group for International Freedom or Belief (APPG) ajanga 2020 report nung ashir.

"Parnoki Boko Haram aser ISWAP tasa den kasa yimya amshir aser Khristanpur aser Khristanpur ayak nung tenük yoktsü tejangja sayur," ta APPG report ajanga ashir.

Nigeria indang Middle Belt

nung Khristanpur dak shiruru metsürtemi amakba ya talisa parnoki tashiyim amshia Khristanpur ali agia Islam yimsü benoktsü tejangraba nung lir, kechiaser ali temu akongba ajanga parnok indang shurur metsütsü tasak akumer, ta Nigeria nung aliba Khristan lenirtemi ashir.

Alima nung Khristanpur alitsü asoshi tamajungtiba tesemtem rongnung Nigeria ya ka lir, ta Open Doors ajanga 2025 World Watch List nung shia lir.

Küm ka tsüngta alima nung tamangba yimsü mechi Khristanpur 4,476 tepsetba nungi3,100 (shilem 69) Nigeria nung lir, ta WWL ajanga ashir.

Linük North-Central zone, kong Khristanpur ya North-East aser North-West dang nungi timba lir, yangjia Islamic extremist Fulani militia temi aluyimer amaker aser nisung Khristanpur timba sür nisung noklang aika tepsetogo, ta report ajanga ashir.

Iba linük northern states tem nung Boko Haram aser jakzüka aoba Islamic State in West Africa Province (ISWAP) ama jihadist telok kanga yakyaka lir, kong federal sorkari junga yimsü mesüteter aser Khristanpuri timtem balala ajurur. Rongsen agi alangzüktiv mechi pua bener aoba tali kumogo.

Azüdokshi ya southern states tem nunga prokshia aor aser northwest nung jihadist terror telok tasen, Lakurawa tenteta radical Islamist agenda nung nok-nü tajung bener lir, ta WWL ajanga ashir. Lakurawa ya Al-Qaeda telungpur nungi jakzüka aoba Jama'a Nusrat ul-Islam wa al-Muslimin den sendaktepa lir.

Alima nung Khristanpur asoshi linük tamajungtiba 50 asadangba 2025 World Watch List nung Nigeria ya jenjang tenet buba nung lir.

Pakistan nung arogo lenirtemi Indo-Pak ceasefire tushia agizüker

Islamabad, Monupii/May 13 (Agencies): India aser Pakistan tsüngta anogo pezü kanga sashia raraba sülen US-i ketdang süa ceasefire sangdongba asoshi Pakistan nung aliba arogo lenirtemi pelashishia agizü aser tarutsü nung tensa tamajungba makumtsü asoshi yimjung aser jembishinü akatsü ayongzüka liasü.

Linük anaprongi ceasefire agreement sangdongba sülen May 10 nü South asia ajunga nung temulung anisüngzüak angu aser Pakistan tesem balala nung aliba arogo temi tenüngsang agüja sarasadema liasü.

Linük ana tsüngta rara anentsüba osang ya US Tir Donald Trump ajanga mezüing sangdonga liasü.

Ajisüaka ghonda ishika tsüngta Indian-administered Kashmir nung bomb apokba

sülen iba tezüngzüktep nung aibelenogo ta linük kati ka aija liasü.

Mangatettep aliba Kashmir nung India tsütsü Islamabad-i yaria amak ta New Delhi-i tai tonglochtsür hopta asem lir mitkartem tsüngta rara ya tenzüik.

May 7 nü India-i kiralongrar indang camp tem nung tenük yoker missile khaloktsü aser iba yongji Pakistan-ia tayang kepzüka artillery khaloktsü. Tensa tamajungba akumba sülen nisung 57 asüba osang lir, aser yangji Pakistan aser Pakistan-administered Kashmir nung nisung 36 asüba densema lir ta osang ajanga ashir.

Pope Leo XIV ajanga May 11 Deobar anogo mezüingbuba jembidang Gaza nung ceasefire alitsü, Ukraine nung yimjung

alitsü aser India aser Pakistan tsüngta teti asoshi tangatettep alitsü ayongzüka liasü. "Ojang raratsüla," ta putiri ayongzüik aser alima nung tashi tait linüktem dang yimjung asoshi inyaktsü ajungshia liasü.

Kasa mapang Catholic Bishops' Conference of Pakistan indang tir Bishop Samson Shukardin-ia Hyderabad nung aliba St, Francis Xavier Cathedral nung May 11 Mass tenzüka linük ana jungshiteptsü asoshi sarasademja liasü.

"Ceasefire ya mapa tajung lir. Iba yagi lendong tulu aliba rara nungi asenok kumzüker. Jembishinü akatsü maneni ayongzüker - rara ya tatem masü," ta Bishop Shukardin-i UCA News dang ashir.

Bishop of Hyderabad ajanga linük ana indang sorkar

ANOGO ABEN TSÜNGREM DEN

Tasak Saka Takoktsü

"Temeshi pur asütsü ajaba"- Rom 1:7.

Temeshi pur asütsü ajaba nung asenoki tematiba sentsüwangshi dang angur masü, saka tasaktibaa angur. Asenoki shidakba tajung akümtsü memerang tashi asenok kodaka majung aji memetettsü. Asenoki shidakba tenla agütsütsü mangatet tashi asenok koda ka merumeru asenoki mangatettsü. Asenok tajung inyaktsü memerang tashi asenok majungbatem mangatettsü. Asenoki temeshi alitsü memerang tashi asenok temenen nisung ta mangatettsü. Aji saka: "Temeshi pur asütsü" ajabaji lir.

Sermon agütsütsü temela, zülutsü temela, ken mejemtsü a temela, telok anishitsü temela, yimsü mapa nung tongtipang shilem agitsüa temela, mapa agi sayua temeshi pur asütsü tasaktiba lir.

Khristan yimsüi tama mapa masü, jakla repranger. Asenok "temeshi pur" asütsü aja. Aji asenoki langka "meinyakdang" "langka" asütsü ajaba. Iba nung teti sotta alitsüa menüngdak. Asenok jakla agi masü, Khrista jakla agi asenok kümzüik. Temeshiba akümtsüba mapa nungji Khrista jaklaji kü jakla akümtsüla aser Tsüngrem tsüngdang obendangba tsütsü nung ni Khrista nung tenokdakdak tasen ka nung noktaker. Saka kodang ni temenen maketba jakla aser Kümtetdakba Khristai kümzüiker ni jakla yanglushir. Kü shilem bendanga agütsüba, aser Pa mapa ajanga kü jakla Pa jakla ama akümer. Asenok mapa agi mekümzüik, saka Tsüngrem shilem pa taochi, aser asenok shilem tamang ajanga kümzüik; aji saka mapa tajung meteni asenok kümzüktiv makok, kechiaser Yakob 2:17 nung Yakobi ashir, "Tamang meteni mapaji tasü"- tamang tasüji tamang masü.

Kilitsür kati ashir, "Ni temulung memeyipdang atem nung alemba sü tema dang aok, ni temulung meyiper iba telunglenjia aoker." Pastor kati asangur sepoy ka dang asüngdang, "Ner kibong nung Khristan akümer shinga mali asü?" Sepoy jagi langzü, "Au, kübu lir." "Nübu Khrista dangi temulung meyipba jagi kibong nung tepila lir asü?" "Au" ta sepoy jagi langzü, "iba jagi kibong nung onok ajak timtemdachtsür." Tebui shidakba temeshi pur noksaji mesayuba sayur. Terunemji teshinem mekümdaktsüi iba jagi ki süngdaktsütsüla. Temeshi pur asütsü asoshi telemtetba takang, saka temeim aser mapa nung tajinütsü keta inyaktsüla.

Asenok temeshi pur akümtsü takoktsü kümdaktsüba asoshi Tsüngrem tenüng sangdi. Tsüngremi ayonzükba ajakji tenangzükbatem lir. Pa ozüngtem ajak takoktsü lir. Ni yamaji asütsü ta mulungtetra, yamaji alitsü. Aser Pa kü mulung nung aliba ajanga Kibubai aji oda inyaktsü. Temeshi taküm ka alitsü temerang; temeshi minute ka alitsü merangang ! Item rokerji temeshi ghonda ka yanglurang, aser ghondatemi anogotem, hoptatem, kümtem yanglur. Minuteji ne meyong. Aji Pa asoshi liang, bilemdang, jangraang, jembidang. Ibaji takoktsü. Khrista ne dak lir. Pa nem agüjang. Pa amangang, Pa tendangang.

dang mapang talangka nungi Christian charity, Ecumenical Commission for Human Development (ECHD)-ia civil society, tamangba yimsü balala lenir aser region nung lokti tentet balala dang kati ka angatetteptsü asoshi inyaktsü ayongzüka liasü.

1947 küm British yimsüsüba nungi nüchiso anguba sülen kidanger linük ana ya Kashmir mechi rara tesashi ana rara lir.

May 10 nü sangdong ka nung Archbishop Joseph Arshad of Islamabad-Rawalpindi ajanga linük anaprong dang nüburtem takum kumzüka alitsü asoshi mapang talangka nungi mangatettep aliba ken o bentettsü atema junga jembishinü akatsü ayongzüka liasü.

"Amalitep akaba, jembishinü akaba, kati ka akumtsübobas aser yimjung asoshi bendanga agütsür inyakba ajanga South Asian region atema yimjung tenzüktiv," ta pai ashir.

Lahore nung amenoka aliba

James Rehmat-i May 10 sangdong ka nung ashir.

AO OSHI ANGAZÜKDAK:**TANÜ ANGAZÜKTSÜBA OJANG****Temshia**

(v) ajak okshia, kecha manüing ajunga (wipe out)

* Mokokchung town nungi tzümar temshia meindok.

Temshir

(n) tedonggtechi, temeimer (lover)

* Nisung shiai pei temshir den temulunglemteta alitsüla.



Tir Yimyim

OLONG PAITEP # 7150

	1		2			3		4		5
6								7		
					8		9			
			10							
11										
				12						
13		14		15						16
17								18		

TIPIEN

1. Inyaker ajangtetba
3. Bangsemo adokdak
6. Shitak mesüi inyak
7. Ya mimong nung angur
9. Reprangzük
10. Tasola
11. S _____
13. Yagi ajak ashioktsür
15. Ki aokba oset
17. Ak shi nung inokba tasen
18. Ishika

-

(3)

-

(5)

-

(7)

-

(3)

-

(4)

-

(5)

-

(3)

LANGTSÜNGLEN

1. Meshidak
2. Tanaben soshir
3. Iba anogo
4. Meshi
5. Yagi mi tsükloker
6. Shi tapu ka
8. Yagi ayimer saka ozü masü
9. Ajokba shiruru ka
12. Inyaktet
14. ___ hi
16. Akümüli nungi pilar

-

(3)

-

(7)

-

(4)

-

(3)

-

(9)

-

(9)

-

(3)

-

(7)

-

(4)

-

(3)

-

(3)

OLONG PAITEP # 7149 TELANGZÜBA**TIPIEN :**

1. Telok, 4. Aluru, 6. Ozüing,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzük,
11. Teronem, 12. Sempa,
13. Jahaz.

NAI-A YA METETTER MA

Alima nung tar talangtiba azüji Zeus lir. Zeus ya Bedford, Texas, USA nungi American Great Dane ka lir aser tar tasazükji 1.046 metres (3 ft 5.18 in) lir. Guinness World Record ajanga iba kuli agütsüogo.

**ACHIEVERS TOP-G ACADEMY**

CREATING FUTURE OFFICERS

ADMISSION OPEN for NEW NPSC BATCH
at MOKOKCHUNG BRANCH ARKONG WARD
OUR RESULTS SO FAR

9 Selections in Final Merit List 2019

23 Selections in Final Merit List 2021

50 Selections in Final Merit List 2022

27 Selections in Final Merit List 2023

200+ Selections in Prelims 2024

50% DISCOUNT FOR
2025 GRADUATES BELONGING TO

- FAZL ALI COLLEGE
- PEOPLE'S COLLEGE
- JUBILEE COLLEGE

40% DISCOUNT FOR
ALL OTHER ASPIRANTS

CLASS STARTS ON 16 JUNE 2025

7005526011/7005714069

AFTER GRADUATION WHAT NEXT??? JOIN ACHIEVERS ACADEMY**Manipur-i BSF jawan Deepak Chingakhm nem tetushi agütsü**

Imphal, May 13, 2025 (Agencies): Manipur nung nübortemi Border Security Force (BSF) jawan Deepak Chingakhm (25) nem akhüm tetushi agütsüogo.

Jammu and Kashmir kübok RS Pura sector nung Indo-Pak artsü anasa 'Operation Sindoor' mapang Deepak-i taküm bendanga agütsü.

Mongulbarnü Imphal East district kübok Yairipok Yambem nung Deepak'er tasoyim nung pa nem full state honours agüja tatembang sentong agiogo.

Deepak indang tasü mangji Delhi nungi Air India flight ka ajanga Imphal-i bener aru. Imphal Airport nung Manipur Governor

Ajay Kumar Bhalla-i anir tongtipang nisungtemi pa nem naro yuja tetushi agütsü.

Airport nungi pa indang mang par tasoyimi bener ao aser idangji mangyimer noklang aikati funeral procession ka agia liasü.

Imphal nungi Yairipok Yambem tashi yimdaklirtem aser nisungtemi "Bharat Mata ki Jai" aser "Long live Manipur" yimymtem ayima procession nung shilem agia liasü.

"Deepak ya Manipur jabaso ka liasü aser linük atema hero ka lir" ta Manipur Governor Ajay Kumar Bhalla-i metetdaksü.

May 10, 2025 nü drone amshia Kharkhola Border Outpost

amakdang 7th Battalion, BSF nungi Constable (GD) Deepak Chingakhm asü ta paisa ashi.

Taoba Manipur Chief Minister N Biren Singh-ia Deepak'er kinungertem den ajurutepa mangyimba metetdaksü.

"Pa dak tasü aitba aser nendaka tenzükba teti bilemtettsü. Par kibongi pa meimba aser nüma atangba ajanga temulung nung kongshir. Pa tanüla anisingzükdakjangma" ta Biren-i metetdaksü.

Manipur state sorkari Major Laishram Jyotin Singh Ashok Chakra (P) Scheme kübok Deepak'er kibong nem Rs 10 lakh teyari agütsütsü metetdaksüogo.

Guwahati police-i TV actor tepsetsang apu

Guwahati, May 13, 2025 (Agencies): Arishi küm 27 tain Assamese television actor Mriganka Barman tepsetba nung tongti süa tai tongloksür puogo.

Guwahati police-i Hajo nung arishi küm 30 tain Raju Ali apu.

Garchuk nung aliba Silver Arcade Marketing Complex nung iba lendong atalok. Nikongdang 4:00 ako meta police nem iba osang sangokja liasü.

Police tesem tonga aodang Nalbari district kübok Japarkuchi nung alir Mriganka Barman kanga mejungi yirur aliba angu. Raju Ali-

i pa dak hadir techira ka amshia amak ta ashi. Police-i Barman Excel Care Hospital-i anir ao saka pa süadok.

Police-i CCTV footage aser technical surveillance ajanga Jan Mohammad Ali (Raju Ali) maitüsü jangiateta liasü aser ghonda ishika tsüingda pa apu.

Police-i bushisüingdanga arudang Barman, Ali aser tetsür ka tsüingda love triangle ka aliba bushitetogo.

Ali-i Barman dak kotari techira kati atsüing aser süng agi azük ta temulung melemi bilemer.

Iba oset anaprong ngutetogo aser forensic experts-i lendong atalokba tesem nung kulitem bendenogo.

"Mriganka Barman aser tetsür ka nikongdang 1:00 ako meta hotel-i aru. Iba sülen tena ghonda ana-asek ka shi lir hotel toktsür ao aser parking lot nung lendong atalok" ta Garchuk nung aliba Hi City Inn Hotel nung staff kati ashi.

Iba tatalokba sülen police-i bushisüingdang tenzük aser Raju Ali apu. Pai iba mapa inyakba atema nangzükogo.

Arunachal CM Pema Khandu-i anir Tiranga Yatra agi

Dibrugarh, May 13, 2025

(Agencies): Indian Armed Forces-i Pakistan anema Operation Sindoor takok anguba atema Northeast India nung mezüingbuba Tiranga Yatra ayongzükba agiogo. Iba sentong ya Arunachal Pradesh kübok China den arrtsütepa aliba Walong nung agi.

Arunachal Pradesh chief minister Pema Khandu-i anir agiba Tiranga Yatra nung DCM Chowna Mein, cabinet minister tem, tanishirtem, Army personnel aser public aden.

Iba Yatra ya Walong War Memorial nung tembang aser idakji 1962 war nung linük kümzükba ayudang taküm bendanga agütsür jawans nem tetushi agüja liasü.

"PM Narendra Modi tanishiba kübok asenok akangakanga lir. Tanü onoki Walong nungi Tringa Yatra tenzükogo. Asen Armed forces-i kechi tensa ajurudir ajuruaka renema lir. Tesüiba mapang lendong ajurudang asen armed forces-i tsükchirtem anema tasü itta noktakogo. Tawa asen armed forces-i Pakistan

nem telangzükba tajung agütsüba nguogo" ta Pema Khandu-i ashi.

"Asen armed forces northern, western, aser eastern fronts nung mapa lemozükja lir" ta paisa ashi.

BJP-i Mongulbar nungi anogo 11 "Tiranga Yatra" tenzükogo aser iba ya nübortem dang Operation Sindoor takok anguba sangdongtsü atema lir.

April 22 nü kiralongrartemi Pahalgam amakba sülen Indian armed forces-i Pakistan nung kiralongrar teseptem maka telangzükba agütsü.

Russia-Ukraine sensaksem nung shilem agitsü Trump-i benok



Kyiv, Monupii/May 13 (Agencies): United States tir Donald Trump-i, Russia tir Vladimir Putin-i Ukraine den indang indanga sensak asemtsü atema benokba nung pa-a shilem agitsü benokdangogo. Anüolen aliba linüktemi linük ana tsüngda rara anentsü atema takhangba agütsüba aitsüba sülen pai indang indang sensak asemtsü benoka liasü.

Trump-i Hombarnü ashiba agi, Brehostibarnü Turkey kübok Istanbul nung agitsü aliba sensaksem nung shilem agitsü atema pa aotsü bilemdar. Trump-i senden nung shilem agitsü shidangba ya Ukraine tir Volodymyr Zelenskyy-i pelashishia agizükogo, saka Moscow-ibo kecha telangzüba magütsü. "Turkey nung senden amenba mapang tir Trump-i shilem agitetra Ukraine nunger ajaki kanga pelatsü. Iba ya

tebilemdangba shitak. Onoki temelenshi aika bener arutettsü," ta Zelenskyy-i ashi. Putin-i Deobarnü Ukraine aser anüolen aliba linüktemi anogo 30 atema ceasefire benoktsü atema nongshiba magizükba sülen linük ana tsüngda indang indanga sensak asemtsü benokba nung adentsü atema Zelenskyy dang Trump-i yimjak nung shia liasü.

Ukraine-i ashiba agi, iba senden nung pai shilem agitsü, saka Putin-ia tsüngtong arua shilem agitsüla. Mongolbarnü pa indang adviser Mykhailo Podolyak-i ashiba agi, Zelenskyy-i Putin dak alaka tanga Russia nunger lenirtem den majuruteptsü. Putin Turkey-i aotsü maotsü, iba dak sendakba nung Kremlin-i kecha telangzüba agüja mali. "Teti atema yimjung asoshi onok bendanga agütsür lir," ta

Kremlin otongdar Dmitry Peskov-i Hombarnü osangbenertem dang ashi. Zelenskyy aser Putin na Brehostibarnü ajurutepra tena 2019 küm December ita sülen tang mezüngbuba tejak o tejak na chitepa ajuruteptsü. Kasa mapang nung Ukraine-i ashiba agi, parnok indang air defence unit temi Mongolbarnü Russia-i yokba drone 10 prongla raksatsüogo. Ukrainian military indang general staff-i ashiba agi, Hombar aonung 10 ako tashi nung Russia nunger den tesem balala nung 133 ben raraogo. Kasa mapang nung Belgorod tesem amakba atema Russia-i Ukraine aitsüogo aser governor Vyacheslav Gladkov-i Mongolbarnü ashiba agi, Ukraine nunger sepaitemi drone 65 aser ammunition round 100 dak tema amshia liasü.

US aser Saudi Arabia sen \$142 billion jenjang arms deal zülutepogo

Riyadh, Monupii/May 13 (Agencies): US aser Saudi Arabia na Mongolbarnü arms deal tuluka nung meyonngem agütsüogo, koba puti otsü nung tezüngzüktep tulutiba alitsü ta White House-i ashir, koba US Tir Donald Trump-i Riyadh nung Saudi Crown Prince Mohammed bin Salman den tezüngzüktep jenti yangluba mapang ka lir. Trump-i Riyadh semdangba mapang, energy security, defence industry, technology leadership, global infrastructure aser critical minerals nung US-Saudi partnership tashi itshitsü nükjidong nung Saudi Arabia-i United States nung sen \$600-billion indoktsü temulungtetba lir, ta sangdonga liasü.

"United States aser Saudi Arabia tsüngta puti otsü nung defence sales agreement tulutiba zülutepogo - sen \$142 billion jungnüa, aser ibaji ajanga Saudi Arabia nem state-of-the-art warfighting equipment agütsütsü," ta White House-i

sangdong ka nung ashi. Item tayokba ya telemsa pongu küboki aittsü - air force advancement and space capabilities, air and missile defence, maritime and coastal security, border security and land forces modernisation, aser information and communication systems upgrades. "Package nungya Saudi service academies aser military medical services tashi ishitsu densema extensive training aser Saudi armed forces tashi ulushiba nung yariba dena lir. Iba deal ya Saudi Arabia indang defence aser regional security nung senotsü indokba tejangja lir," ta White House-i ashi. Trump meina billionaire Elon Musk densema US shishilempar aika arua Riyadh nung anenzük aser iba sülen Bodhbarnü Qatar-i aotsü aser Brehostibarnü United Arab Emirates-i aotsü. "Riyadh nung Saudi crown prince den senden ka

amendang, "Asenok kati ka kanga sakloker ama ni amanger," ta Trump-i ashi. Trump-i Israel semdangtsü sentong mali aser tang Israel o Saudi sorkar tsüngta temulung mechitep adoka lir. Riyadh indang \$600 billion agreement nungya Saudi firm DataVolt ajanga AI dak sendakba tesemtem nung sen \$20 billion indoktsü, high-capacity IV fluid facility semzüktsü asoshi Michigan nung plant ka nung Shamekh IV Solutions ajanga sen \$5.8 million indoktsü dena lir. Kasa mapang Google, DataVolt, Oracle, Salesforce, AMD, aser Uber amala company temi linük anaprong nung cutting-edge transformative technologies nung sen \$80 billion indoktsü temulungtetba lir, ta White House ajanga ashir. Middle East nung Saudi Arabia ya United States den shishilempar tulutiba rongnung ka lir.

India den rara nung nisung 50 dak tema asü: Pakistan army

Islamabad, Monupii/May 13 (Agencies): Pakistan army-i Mongolbarnü sangdong ka ajanga ashiba agi, taoba ita India den rarepba mapang nisung 50 dak tema tepsetogo. US teyongtsüi ia ceasefire ka benokba sülen kidanger linük ana tsüngda rara anena liasü. Alima penzürtem amakba atema telangzüba agüja India-i Pakistan aser Pakistani Kashmir nung kiralongrartem amendaka aliba tesem balala amak ta ashiba sülen kidanger linük ana tsüngda missile khaloktsütepba den drone tem amshia military tamendakdak balala maktepogo. Pakistan-i ashiba agi asürtem ya timba civilian tem liasü. Military-i ashiba agi, asürtem rongnung civilian 40 aser sepai 11 densema lir. Kasa mapang nung India-ia sepai pongu aser civilian 16 asüba osang metetdaksüogo. United States-i nongshiba sülen linük anapronglai Honibarnü ceasefire ka benoktsü atema mulunga agizüka liasü. Indian military-i ashiba agi, parnok base tem terara raksaogo saka inyaksangshiteta dang lir. Ato Kilonser Narendra Modi-i Adampur air base semdangba noksa ka Mongolbarnü X nung

lemsatepogo. Iba base ya Punjab nung arrtsü anasa amenoka lir, koba air force atema kanga tongtimbang lir. Hombarnü Modi-i, India makra arrtsü adener kiralongrartem maneni amaktsü aser Islamabad-i nuclear agi blackmail asüba ajanga iba amala inyakyim ya menokdangtsü, ta amokmerenogo. April 22 nü alima penzürtem maka parnok 26 tepsetba ya India-i Pakistan dak tai tongloktsüogo, koba Islamabad-i magizüki arudar. India aser Pakistan napronglai Kashmir ya shilem kaka yimsüsüdar aser linük anapronglai iba tesem ya ajunga parnok meyong ta shia arudar. Kidanger ana ya 1947 küm nüjiso anguba sülen iba tesem asoshi anabenbo raraogo aser 1999 aser 2019 küm densema aiba mangatettep adoka arudar.

SANGDONGER

Tir Yimyim adok August 6, 2019 anogo nung Sangdonger ta sür Mr.Maongtoshi ajanga Mr.Aolepden den ni kecha sentsü senmang nung tesendakteptsü mali ta adokba tanü May 13, 2025 anogo nung ni meyipa agir ta sangdonger.
Tebu Sdl/- Maongtoshi.

GOVERNMENT OF NAGALAND
MOTOR VEHICLES DEPARTMENT
OFFICE OF THE TRANSPORT COMMISSIONER
NAGALAND: KOHIMA-797004
e-mail: commrtrans-ngl@nic.in
ADVERTISEMENT

Date: 13th May, 2025

NO.TC-ESTT-DRB/367/2025: In pursuance to the approval of the Government, vide Letter NO. TPT/TC/ESTT-4/95 (PT) 828 Dated 08.04.2025, applications are hereby invited for filling up the vacancies post of MTS (Group-D) under Motor Vehicles Department, Nagaland, in the manner prescribed below:

Sl. No.	Name of the Post	Number of Vacancy	Office	Remarks
1.	Multi Tasking Staff (MTS)	1	Regional Transport Office, Mokokchung	Indigenous inhabitant of Mokokchung District
		2	District Transport Office, Wokha	Indigenous inhabitant of Wokha District
		1	District Transport Office, Phek	Indigenous inhabitant of Phek District

TERMS AND CONDITIONS:

1. Educational Qualification:

The minimum educational qualification will be Class-VIII passed.

2. Age as on 01.01.2025:

Minimum- 18 years and maximum-37 years.
Note: Upper age limit is relaxable by:
a) 5 (five) years for candidates belonging to ST.
b) Age concession for serving Government Employees will be allowed, the equal number of years they are in service to a maximum of 5 (five) years.

3.

Reservation of quota shall be as per Government Office Memorandum and Notifications.

4. Documents required:

a) Educational qualification certificates.
b) Birth Certificate.
c) Indigenous Inhabitant/ Scheduled Tribe Certificates as per P&AR Department Notification NO.AR-16/7/94 Dated 02.02.2016 (New Format).
d) NOC from HoD for Government employees (in original).
e) For Persons with Benchmark Disabilities (PwDs), a certificate from competent Medical Authority required.
f) 2 Nos of recent passport size photo.

5.

Application form shall be issued from the Office of the Transport Commissioner, Nagaland and in the respective District Offices w.e.f 14th May 2025 or can be downloaded from the Department website: www.mvdnagaland.in

6.

Applications received after the closing date or with incomplete documentation will be summarily rejected.

7.

Eligible Candidates for interview shall be shortlisted and displayed on 27th May 2025 on the Notice Boards of the Transport Commissioner's Office, Nagaland and in the respective District Offices as well as in the Department website: www.mvdnagaland.in .

8.

The date of interview for shortlisted candidates is fixed on 30th May 2025, at the Transport Commissioner's Office, Motor Vehicles Department, Nagaland.

9.

Last date for submission of application form will be on or before 23rd May 2025.

Sdl/-

(ELIAS T. LOTH)

Transport Commissioner

&

Chairman, DRB

NECDC asayamung: Nagaland team final-i iogo



Vino G Zhimomi nem Player of the Match tetushi agütsüba noksa nung angur.

Dimapur, Monupii/May 13 (TYO):

Mongolbarnü Nagaland Cricket Stadium, Dimapur nung tang asaya aliba 3buba NECDC Senior Men's Interstate Friendship Tournament 2025 nung Nagaland team-i wicket 4 agi Manipur team koka final-i iogo.

Iba asaya akokba sülen Nagaland team tang agi küm asembubaba atonga NECDC finals-i iogo aser parnoki otsüsütsüsa iba asayamung asembenbuba abentsü akok.

Tsüngsang majungba ajanga over ajemja over 42 dang asayaba sülen Nagaland team-i target yanglushir aliba run 148 ya ball 7 anunga lia menepa liasü.

Asaya nung Vino G

Zhimomi-i kanga dang tongtibang wicket asem agiba sülen pa nem Player of the Match naroküm agütsü.

Mezüng batting amenba sülen Manipur team-i over 49 nung asayar 9 out sür run 159 yanglua liasü. Parnok rongnungi Jotin Singh Pheiroijam-i maneni kanga junga asaya-a pai ball 86 nung run 72 yanglu.

Ajisüaka Vino G Zhimomi-i (3/14) anir Nagaland team bowler temi ball kanga junga ona run aikabo meyangludaktsü. Bowler tem rongnung Akavi A Yeptho-ia run 30 agütsür wicket 3 agia liasü.

Tanabuba innings nung Nagaland team-i over 38.5 nung

asayar 6 out sür run 150 yanglua asaya koka liasü.

Nagaland team batter tem rongnungi Yugi-i run timtiba yanglua pai ball 48 nung run 46 yanglu aser Nchumbemo Humtsoe-ia out mesüi ball 64 nung run 35 yanglua team takok dangi ania liasü.

Manipur team bowler tem rongnungi Jotin Singh Pheiroijam-i ball kanga junga ona pai over 8 nung run 27 agütsür wicket 3 agia liasü.

Player of the Match Vino G Zhimomi-i run aika magütsüi ball kanga junga ona wicket 3 tashi agiba ajanga Nagaland team nem teyari agütsüogo. Pai kanga junga asayaba atema Player of the Match naroküm agüja liasü.

Siliguri Champions Trophy ajanga lanur asayartem sempet sayur



Monupii/May 13, 2025

(Agencies): North Bengal aser Northeast nungi cricket team temi shilem agia Siliguri Champions Trophy 2025 tenzüko.

Team timbai shilem agiba sülen iba asayamung ya iba tesem nung kanga tongtibang asayamung ka kümogo. Taküm iba asayamung nung team timbai shilem agiba nguogo aser Wai Wai amala global brand temi nongita yaridar. Iba noodle brand den partnership yangluba ajanga grassroots cricket tashi itshidaktsür aser lanur asayartem nem parnok sempet sayutsü atema sabang tuluba agütsür.

North Bengal aser Northeast India nung asaya ajak rongnung football nüngtugutiba lir, saka cricket-a nüngtugu kümдар. Siliguri Champions Trophy amala asayamung ajanga lanur asayartem nem tajangshiba agütsüba den parnok sempet arantetshitsü atema teyari agütsür.

"Local sports league tem ya tarutsü national aser international asayartem atema tongtoret lir. Lanur asayartem atema sabang shitak yanglutsütsü aser tajangshiba agütsütsü kanga tongtibang lir," ta Wai Wai yangluba CG Foods, Global CEO Varun Chaudhary-

i ashi, "Lokti anidentsü aser lanur asayartem sempet benjungtsü atema Wai Wai-i teti nongita yaria aruogo."

Siliguri Champions Trophy ajanga tokteptsü asoshi sabang tajung agüja sempet tajung aketba lanur asayartem ajungketer aser iba ya lokti-i agizükba asayamung ka kümogo. Wai Wai amala brand kati iba asayamung nongitba ajanga nisung timbai shilem agitsü atema ajungmesor. Asayamung asayayonga aoba mapang league ajanga lanur timba ajungmsotsü aser regional cricket tali nüngtuguba akümtsü imlar.

England ODI squad nung IPL asayar pongu densema lir

Monupii/May 15, 2025

(Agencies): Indian Premier League nung densema aliba England nung asayar pongu iba ita tatemlen West Indies den asayatsü aliba one-day international asayamung atema team nung züngoksema lir.

IPL asaya mapanglem melenshiba sülen final ya June 3 nü asayatsü lir. Kasa anogo England aser West Indies na tatembangbuba ODI asayatsü.

Jos Buttler, Jacob Bethell, Jamie Overton, Jofra Archer aser Will Jacks nuneg asayar 16 agi kümtetba ODI squad nung densma lir, kong spinner Tom Hartley aser pace bowler Brydon Carse nata densema lir, saka Liam Livingstone bo meshim.

IPL nung asayarsa Phil Salt, T20 asayamung nung asaya asem atema England squad nung züngoksemogo, koba ODI asayamung tembangba sülen anogo asem lir tenzüksü.

England and Wales Cricket Board-i May 25 nü tashibo no-objection certificates (NOC) agütsüogo. Iba anogo IPL tembangtsü liasü, saka tang

anogo melenshiba sülen ECB-i ken o asadangshitsü.


IPL nung shilem agia aliba England nung asayar 10 prongla Mongolbarnü Professional Cricketers' Association den senden ka mena India-i meyipa aotsü asoshi security dak sendakba nung ken o sensaksemogo.

India aser Pakistan na raratepba ajanga IPL ya Hokolbarnü nungi tenzüka hopta ka atema anena ata. Asayamung ya Honibarnü nungi tenzüksü.

England ODI squad: Harry Brook (c), Jofra Archer, Gus Atkinson, Tom Banton, Jacob Bethell, Jos Buttler, Brydon Carse, Ben Duckett, Tom Hartley, Will Jacks, Saqib Mahmood, Jamie Overton, Matthew Potts, Adil Rashid, Joe Root, Jamie Smith.

England T20 squad: Harry Brook (c), Rehan Ahmed, Tom Banton, Jacob Bethell, Jos Buttler, Brydon Carse, Liam Dawson, Ben Duckett, Will Jacks, Saqib Mahmood, Jamie Overton, Matthew Potts, Adil Rashid, Phil Salt, Luke Wood.

Andy Murray aser Novak Djokovic na pilaogo



Monupii/May 13, 2025

(Agencies): Novak Djokovic-i pa coach asütsü Andy Murray shimba sülen ita trok lir tena pilaba Mongolbarnü metetdaksüogo.

November ita Djokovic-i sangdong ka ajanga pa coach asütsü atema Murray shimba sangdonga liasü, shibai coach mapa khen danga inyakdanga maliasü.

Ajisüaka arishi küm 37 tain asayar ana ya pilaogo aser Britain nung Murray-i Serbia nung nüngtugu asayar dang iba tamamangtsü maongka asoshi kanga pelaba lemsatepa liasü.

Grand Slam kija asaya 24 tashi koker alisang Djokovic-i season junga metenzükteti taoba asayamung ana nung mezüngbuba asaya nung tsükatokba sülen tang tena pilaba osang sangdongogo.

"Külemi inyaktsü atema iba tamamangtsü maongka

agütsüba asoshi Novak dang kanga pelar aser taoba ita trok tsüngda kanga meranga inyakba atema par team danga kanga pelar," ta Murray-i ashi.

"Novak season nung tanungba asayamungtem takok nung asayayonga aotsü imlaja atar," ta Murray-isa shisem, shibai 2012 US Open aser 2013 Wimbledon finals nung Djokovic koka Grand Slam asem rongnung ana koka liasü.

Tena partnership kanga junga tenzüka Djokovic-i Australian Open nung Carlos Alcaraz tsükdaktsü, saka semi-final nung Alexander Zverev den asayaba mapang yirur masayatetsüsa aküm.

Ajisüaka iba sülen pai takok monguteti arudar aser Djokovic-i Mongolbarnü ashiba agi, "coach Andy dang pai kanga meranga inyakba aser taoba ita trok tashi court telung aser tema nung ni nongita yariba atema kanga pelar."

BILEMDANGANG

**"Kera onüra kija jajang;
talangka onüra külemi jajang."**